

Q. D. T. O. M. B. V.

DISSERTATIO MEDICA

DE

# EMENDATIONE TEMPERAMENTORVM

QVAM

RECTORE MAGNIFICENTISSIMO

SERENISSIMO PRINCIPE AC DOMINO,

DOMINO

## GVILIELMO HENRICO,

DVCE SAXONIAE, IVLIACI, CLIVIAE, MONTIVM,  
ANGARIAE, WESTPHALIAE, ET RELIQVA,

CONSENSV

ILLVSTRIS ET GRATIOSISSIMAE FACVLTATIS MEDICAE  
IN ALMA SALANA

SVB PRAESIDIO

## IOHANNIS CHRISTIANI STOCKII

PHILOSOPHIAE ET MEDICINAE DOCTORIS,  
PLACIDAE ERVDITORVM DISQVISITIONI

PVBLICE SVBMITTIT

## IOHANNES VVOLFGANGVS HAAG

BARVTHO-FRANCVS, PHILOSOPHIAE ET MEDICINAE CVLTOR.

DIE VII. APRILIS M DCC XXXI.

---

I E N A E,  
LITTERIS HORNIANIS.







I. N. I.

## PROOEMIUM.

**T**Am ratione, quam experientia duce, constat multo certissime, quod sui cuique mores & valetudinem & fortunam fiant.

Tritum vero est proverbium: *Mores sequuntur humores*. Etenim hoc tam certum est, quam quod certissimum, quod a partium corporis humani constitutione, tum hominis actiones, quæ ipsi secundum naturam conveniunt, tum etiam inclinationes & propensiones certam modificationem subeant. Sub illis vero potissimum *humorum* comprehenditur *negotium*, ut horum temperies eas omnes maxime determinet.

Nomine *temperiei* intelligimus certam humorum, eorumque partium constituentium, quoad quantitatem, qualitatem, miscelam & motum, dispositionem, ex qua tanquam effectus procedunt certæ humani corporis qualitates, ut ipsum, diversa ratione, diversoque gradu. sit *calidum*, *humidum*, *frigidum*, *siccum*, unde diversa tempera-

peratura confurgit, quæ individualement actiones exercendi facultatem dispensat.

Laudatam humorum temperiem etiam *temperamentum*, vel cum aliis, *naturam hominis* dicimus.

Quia humores variis de causis & temporis successu, aliam, aliamque acquirunt conditionem, indeque temperamenta mutationem subeunt, & quidem vel in melius, vel in pejus, non inconsultum fore, existimamus, si de *temperamentorum emendatione* cogitemus, partim, ut sanitati prospiciamus, partim, ut cujusque mores virtutibus respondeant.

Hoc thema pro specimine publico exhibendo elegimus.

Clementissimum in cœlis Numen, a quo omnia bona expectamus, & accipimus, nostris adspiret conaminibus, corporis, mentisque largiatur vires, ut labores

nostri in Divini Nominis gloriam peragantur felicissime.



§. I.

**R**ecepta quidem est in scholis physicis & medicis *distinctio inter temperamentum mixti & viventis*; Sed, misso *temperamento mixti*, nos hic loci *viventis temperamentum* pro instituti ratione perpendimus.

§. II.

*Viventis temperamentum* duplici ratione definiri potest, mox ad ipsius rationem formalem, mox ad causam respiciendo. Unde illius definitio erit *vel formalis vel causalis*.

§. III.

*Definitio formalis*: *Viventis temperamentum* est qualitas corporis humani viventis, actionibus ipsi secundum naturam competentibus obeundis apta.

§. IV.

*Definitio causalis*: *Viventis temperamentum* est certa humorum, nominatim sanguinis & feri, eorumque partium constituentium, quoad quantitatem, qualitatem, miscelam & motum, dispositio.

§. V.

Has vel qualescunque de viventis temperamento alias definitiones si exactius ponderamus,prehendimus, quæ iis innuuntur, omnia in compendio haberi in sequenti definitione, quam elegantissime exhibuit, & solidissime demonstravit, Illustris atque Magnificus D. D. Jo. Ad. Wedelius in *Dissertatione de temperamento viventis*. Definit enim Excellentissimus Vir *viventis temperamentum, quod sit qualitas corporis humani viventis, a sanguinis & feri inpropria, se invicem pro varia utriusque proportionem temperante proveniens, actionibus, quæ secundum naturam sunt, perficiendis apta*.

§. VI.

*Subiectum principale* est *massa sanguinea*, a qua nutriumtur, augentur & conservantur partes solidæ, ita ut hæc, imo totum corpus humanum, ab ea temperiem accipiant.



Hinc *adæquatum temperamentum* subjectum est totum corpus humanum,

§. VII.

Est vero massa sanguinea *fluidum maxime heterogeneum*, id quod ex ipsius genesi, analysi chimica, fluidis variis ex ipsa oriundis, diversaque ipsius activitate cognoscere licet. Duæ autem præcipuæ in massa sanguinea partes se sensibus manifestant, quarum *una rubicunda est*, & *αἷμα ἔχειν* sanguis appellatur, altera *albicans* & *magis aquea* existit, quæ *serum* dicitur. De his per principia physiologica evictum est, *prioris* potiore in calore, *alterius* in humiditate consistere. Uti vero calor & humiditas aliquid *positivi* involunt, ita frigus ex caloris, siccitas ex humiditatis defectu resultant, adeoque aliquid *privativi* innuunt. Dum vero *serum* illa activitate, quam sanguis habet, destituitur, & vice versa, sanguis illam, quam serum, activitatem non habet, facile intelligi potest, quo pacto utriusque humoris activitates se invicem temperent,

§. VIII.

*Sanguinis partes constituentes* sunt diversi generis, sulphureæ scilicet, salinæ alcalicæ, acidæ, volatiles, fixæ, terrestres, quæ varia proportionem præsentem, modo & gradu diversam *ἐνέχουσιν* in corpore præstant. In hoc autem omnes fere consentiunt Physiologi, quod, quo plus sulphurearum, & alcalicarum volatilium particularum, quæ priores resolvunt, continet sanguis, eo magis calor in corpore emineat, contra vero deficiat, quo magis illæ ab acidis fixioribus, terreis, superantur. Etsi autem particula sanguinis sulphureæ ad calorem concipiendum & fovendum vel maxime aptæ habeantur; nunquam tamen eum rite præstare possunt, nisi motum intestinum blandum subeant; hunc vero ipsis conciliant partes in sanguine hærentes spirituosæ, principium corporis humani vitale constituentes, a quibus sanguinis motus vitalis, ipseque calor dependet. Vid. Illustris & Magnifici

D. D.



D. D. Jo. Ad. Wedelii Dissertatio de principio vitali. Variat vero hoc ipsum principium, ejusque efficacia, pro massæ sanguineæ ipsius varietate atque constitutione, vid. jam laudati Viri Diss. de temperamento viventis.

§. IX.

Ut maxima pars sanguinis sulphur, ita feri aqua est. Præter hanc vero ipsum serum quoque particulas habet gelatinosas, sulphureas, longe vero temperatiore, quam in ipso sanguine. His immersæ sunt salinæ, imprimis acidæ, blandiores tamen, pauciores alcalicæ, hinc & terrea. Partes serum constituentes, pro diversa quantitate & proportionem, illius activitatem gradu diversam exhibent. Quo magis infero pars aquea & gelatinosa exsuperat, salinarum alcalicarum vero quantitas minor est, eo majorem sanguinem refrigerandi & humectandi vim illud obtinet. Aquea enim feri pars sanguinis calorem temperat, diluendo, & gelatinosa involvendo partes sanguinis activiores, earumque motum refrenando. Acidum autem ferro junctum, sanguinis sulphur sale alcalico volatili expansum & rarefactum figit. Quando vero in ferro magis sal alcalicum eminet, partium gelatinosarum & acidarum vis infringitur; Hinc calor sanguinis, ejusque siccitas minus temperatur. Et generatim, quo major ferro inest salium quantitas, eo minor ejus sanguinem humectandi vis apprehenditur.

§. X.

Ex quibus colligere licet, omne viventis temperamentum a sanguinis & feri mixtura, se invicem temperante, hanc vero ab utriusque humoris vitalis quantitate, qualitate, & miscela, verbo, a proportionem humorum vitalium dependere. Adeoque immediata temperamenti causa asseritur, sanguinis & feri mixtura se invicem convenienti ratione temperans; & causa mediata proximior sanguinis & feri proportio, quæ in partium massam sanguineam componentium quantitate & miscela in variis va-



ria diversimode radicitur. Ex diversa itaque massæ sanguineæ constitutione, *temperamenti diversitas* patere potest. Illius vero *ratio*, ex causis temperamenti remotioribus inferius recensendis, patebit.

### §. XI.

*Differentiam essentialem* temperamenta fortiuntur ab humorum vitalium proportionem, & inde determinata *ἐκπύησις*. Hæc cum sit vel *ordinaria*, quæ omnibus communis est hominibus, & in calore atque humiditate, siccitate & frigore, diverso gradu combinatis consistit; vel *extraordinaria*, quæ huic vel illi individuo propria est; *temperamentum* ideo generatim erit vel *ordinarium* vel *extraordinarium*, hoc *ἰδιόσυγγαλῆς* vocatur, quia peculiarem partium massæ sanguineæ spirituosarum texturam supponit, a qua, hoc vel illo objecto præsentem, spiritus animales motum subeunt extraordinarium, ut effectus plane extraordinarii edantur, hi vero ita se habent, ut quis vel ferre possit sine omni noxa, quod alias natura humana abhorret, vel aversetur, quod reliquis hominibus gratum habetur, imo symptomata hanc ob causam præsentem graviora experiatur, ne dicamus, quod ex adversis objectis præsentibus quidam morti succubuerint, ita ex rosarum odore nonnullos extinctos fuisse, refert Cromerus L. de origine & rebus gestis Polonorum, p. m. 138. Plura de *extraordinario temperamento* dicendi hic non amplius locus erit; Alia forsân occasione, Deo favente, hanc tractationem suscipiemus.

### §. XII.

Massa sanguinea suam constitutionem, a qua *temperamentum* dependet, vel a primo statim hominis ortu habet, vel eam post nativitatem recipit; Hinc *temperamentum* aliud est *nativum*, aliud *ascititium*. Ut vero statim ad essentialem temperamenti differentiam revertamur, hanc a sanguinis & feri *ἐκπύησις*, se invicem pro varia utriusque proportionem, diverso gradu, temperante deduximus.



mus. Cum itaque 1) *sanguinis ieiuncta* in calore, *seri* vero in humiditate consistat, & 2) *hujus* minor gradus sub ficitatis, *illius* sub frigoris nomine veniat, 3) nullum datur *absolute* simplex, sed ex duabus qualitatibus compositum temperamentum, 4) *hujus* differentia a primis illis qualitatibus, desumenda sit; Liquido constat, quod, pro diverso caloris & humiditatis gradu combinato, *temperamentum* sit *vel calidum & humidum*, *vel calidum & siccum*, *vel frigidum & humidum*, *vel frigidum & siccum*. A potiori vero humorum parte, quæ prædominatur, suamque efficaciam in corpore maxime exerit, denominationem specialem illud accipit.

## §. XIII.

Ita a parte *massæ sanguineæ rubicunda*, sive *sanguine* *castæ* dicto, dicitur *temperamentum sanguineum*, quia in hoc sanguis, sero blando tamen temperatus, *ieiuncta* suam præstat, ut duæ qualitates, calor & humiditas bene sint commensuratæ, quo pacto temperatissimus, & sanitati maxime conveniens status habetur.

## §. XIV.

Quando vero in *massa sanguinea salinæ sulphuræ* volatiles partes, quæ bilem alimentariam constituunt, eminent, serosæ vero temperantes respective deficiunt; Inde dependens sanguinis & *seri ieiuncta temperamentum* constituit *calidum & siccum*, quod a partibus biliosis magis eminentibus *biliosum*, sive *cholericum* vocari solet. *Istæ* partes si ab acidis per fermentationem intimius conjunctis magis acuiuntur, *atrām bilem* a veteribus dictam constituunt, quæ calorem & ficitatem adhuc magis intendunt, ab ista *atrabiliarium* nominatur *temperamentum*.

## §. XV.

Illam *sanguinis & seri proportionem*, qua in sanguine partes biliosæ, sive *salinæ sulphuræ* volatiles deficiunt,



dum ipse sanguis minori adest quantitate, serum vero exsuperat, in hoc vero maxime eminet pars gelatinosa, quam *pituitam* nominaverunt Veteres, *temperamentum* sequitur *frigidum & humidum*, quod *phlegmaticum*, vel *pituitosum* dici consuevit.

#### §. XVI.

Si massæ sanguineæ constitutio talis sit, ut sanguis respective deficiat, & serum magis scateat *particulis acidis fixioribus, & terrestribus*, quæ sanguinis sulphureas & activiores deprimunt particulas, ut calor pariter & humiditas minorem gradum habeant, *temperamentum* inde confurgit *frigidum & siccum*, quale speciatim *melancholicum* vocari solet, ob acidum fixius, terreum, quod in sero prædominium habet, & a veteribus *melancholia* appellatur.

#### §. XVII.

Cum *temperamentum* sit qualitas, omnis vero qualitas recipiat magis & minus, h. e. intendi & remitti possit; Inde facile intelligi potest, quod vario gradu temperamenta enascantur. Et quia cujusvis temperamenti causam in se continet homo, quod massæ sanguineæ heterogeneitas, & partium illam componentium varia conditio comprobatur; Exinde haud difficulter demonstrari potest, quod ex quatuor cardinalibus temperamentis recensitis non unicum ac solum, sed ex iis diverso gradu & modo mixtum *temperamentum* in homine sit statuendum, quod etiam quotidiana experientia vel millenis confirmat exemplis. Uti vero semper a potiori denominatio capit initium, ita quoque hoc de temperamenti valet; Quod nempe prædominium habet *temperamentum*, præcipue nominatur, ut vero ejus, ad quod prius inclinatur, vel quod priori statim substat, simul mentio fiat, ejus quoque nomen attenditur, sed prioris & potioris temperamenti nomini postponitur. Servantur vero nomina ab humoribus desumenda, E. g. Si in sanguineo



guineo temperamento sanguis magis biliosus fit, non tamen tanto gradu, ut in bilioso & choleric temperamento, tunc a potiori quidem fit denominatio, quia autem sanguineum temperamentum tunc magis ad cholicum inclinatur, vocatur sanguineo-cholicum. Porro si adsit temperamentum phlegmaticum, inclinatur vero ad sanguineum, phlegmatico-sanguineum tunc auditur temperamentum. Si melancholicum temperamentum inclinatur ad cholicum, ob proportionem humorum vitalium huic statui conformem, melancholico-cholicum dicendum erit temperamentum, & sic quoque in reliquis.

## §. XVIII.

Quæcunque massæ sanguineæ partium constituentium quantitatem, qualitatem, miscelam, motum, conservare, vel aliter disponere, & mutare, adeoque sanguinis & feri proportionem, & inde pendentem conservare, vel mutare valent, sunt temperamentorum causæ mediatae remotiores.

## §. XIX.

Sic ex rebus naturalibus, si de nativi temperamenti conditione ratio sit adducenda, revera haud parum facit ad temperamenti constitutionem dispositio hereditaria. Siquidem fœtus humores ab humorum proportionem in parentibus præsentem similem constitutionem acquirunt, tametsi hæc ob alias causas accedentes, quandoque aliam conditionem admittat, unde etiam differentia inter nativum & ascitivum temperamentum derivanda est.

## §. XX.

Inter præcipuas ex rebus naturalibus causas locamus viscerum constitutionem, quippe quæ in conjugio & discipulo humorum, adeoque in ipsorum proportionem fundamentum præbet.

## §. XXI.

Multum etiam proportioni humorum tribuit *habitus corporis*, quatenus pro diversa, vasorum, meatuum, & pororum ratione, humorum circulus, inde humorum *exupersio & diapsis*, hinc & humorum proportio determinatur.

## §. XXII.

Nec minus *sexus diversitas* ad temperamenti conditionem facit. Fœminæ enim præ maribus serosiores deprehenduntur, hinc est, ut in sequiori sexu pauciores cholericici vel melancholici, plures autem sanguinei, vel phlegmatici, vel sanguineo-phlegmatici temperamenti esse, inveniuntur.

## §. XXIII.

Porro ex naturalibus causis est *etas*. Juxta hujus enim statum humorum proportionem determinari, per principia physiologica, constat.

## §. XXIV.

Humorum proportionem maxime disponit *conditio & usus rerum non naturalium*, ex quibus *aër calidior* partium in massa sanguinea activiorum evolutionem, & motum majorem, serosarum vero dissipationem præstat. *Frigidus* contra *aër* partium activiorum concentrationem & motum torpidiorem, serosarumque partium, & sub his imprimis gelatinosarum accumulationem efficit. *Humidus*, item *ventosus aër* superfluarum in humoribus partium excretionem impediendo, humorum proportionem mutat. *Aër siccus*, simulque *calidior* existens, partium serosarum imminutionem facit. Sic quoque obscurum esse nequit, quod *anni tempora* ob aëris varias mutationes in massa sanguinea, quoque alterationem inducere valeant. Nec minus *climatis & regionis conditio* massæ sanguineæ proportionem, adeoque temperamentum determinat.

## §. XXV.



## §. XXV.

*Cibus & potus*, dum materiam præbent massæ sanguineæ, tales etiam in hac partes incrementum capiunt, quales in illis abundant, adeoque alimenta tum *quantitate*, tum *qualitate* ad temperamenti conservationem, vel mutationem plurimum faciunt. *Motus* vel in *excessu* vel in *defectu* peccans, similiter *somnus & vigilia*, secretionem atque excretionem humorum disponendo, faciunt vel ad quarundam in massa sanguinea partium excessum, vel defectum; Unde quoque massæ sanguineæ proportio, adeoque temperamenti conservatio, vel mutatio determinatur.

## §. XXVI.

*Animi pathemata* spirituum & humorum motum aliter disponendo, humorum quoque proportionem mutant. *Excreta & retenta*, partium in massa sanguinea excessum vel defectum inducendo, ipsius proportionem mutant. Huc referendæ sunt *evacuationes* studio institutæ, sanguinis missio, adeoque venæ sectio largius & crebrius instituta, purgationes, sudationes modum excedentes; Item *medicamentorum abusus* huc pertinet.

## §. XXVII.

*Morbos* temperamentorum mutationem potenter efficere, experientia suo comprobat calculo. Ita a *febris*, si diutius durent, temperamenta notabilem mutationem patiuntur. Non solum vero *intemperiei morbi* ad temperamenti mutationem multum faciunt, sed etiam *morbi conformationis*; Speciatim *viscerum depuratoriorum obstructions*, quatenus humores ob massæ sanguineæ circulum, per cava viscerum, læsum, *ὀξύπνοιν & διάγνωιν* ita subire nequeunt, ut temperamento determinata massæ sanguineæ proportio maneat. Hinc est, ut *affectus hypochondriacus*, nec minus *affectus hystericus* diu durans, insignem temperamenti mutationem inferant. Ita viscerum depuratoriorum obstru-

ctio e. g. temperamentum sanguineum successu temporis in phlegmaticum vel melancholicum convertere valet.

§. XXVIII.

Causis temperamentorum etiam accenferi debent *educatio, hominis status & conditio, vitæ genus, consuetudo, conversatio, aliorum imitatio, peregrinationes.* Ab his enim & similibus causis rerum non-naturalium conditio & usus varie determinatur, ut hanc vel illam proportionem recipiat massa sanguinea, ipsumque temperamentum intensiorem, vel remissionem, vel majorem mutationem subeat.

§. XXIX.

Actiones & propensiones hominis tanquam effectus temperamenti dant hujus signa. Paucis itaque cardinalium temperamentorum signa recensebimus, quibus cognitis, reliquarum specierum signa, absque difficultate evolvi possunt.

§. XXX.

*In sanguineo temperamento corpus*prehenditur moderate calidum, molle, agile, facies florida, venæ sanguine turgent, pulsus est magnus, plenus, æqualis, appetitus bonus; Ut digestio, chylicatio & sanguificatio, ita quoque nutritio & auctio bene succedunt; Semen copiose fecernitur, unde libido multum se exerit, insomniis veneris crebrius tentantur sanguinei, cæteroquin somnus profundus esse solet. Sensus & motus vigorem & alacritatem præbent. Memoria mediocriter se habet, ingenium judicium plerumque superat. Sunt ejusmodi homines variabiles, novas res appetunt, sæpius ostendunt animi hilaritatem, sunt pacifici, amicitiae & æquitatis amantes, benefici, otii tamen, voluptatis & securitatis amorem produunt, in periculis sunt meticulosi. Disponit sanguineum temperamentum ad plethoram & omnis generis inde oriundos morbos, ad febres, maxime ad synochas,



ad inflammationes, catarrhos, rheumatismos. In juventute sanguinei sæpe experiuntur hæmorrhagiam narium.

## §. XXXI.

Signa *cholericæ temperamenti* sunt calor & siccitas, pulsus deprehenditur magnus, celer et vehemens, vasa majora sunt & turgida, facies cum virore pallida est, habitus corporis macilentus, quia nutritio in ejusmodi hominibus est parcior, pauca appetunt, etsi plura concoquere possint. Sitis est frequentior, sunt brevioris somni. Semen in talibus majorem activitatem habet quam in reliquis temperamentis. Actiones animales vegetiores sunt, ac in reliquis temperamentis. Cholericæ sunt ingeniosi & perspicaces, ut tamen judicium emineat; In negotiis gravioribus quoque exsequendis magnam præstant alacritatem & dexteritatem. Sunt temerarii, superbi, facile incandescunt, mox tamen ira defervescit. In febres aliosque morbos intemperiei calidæ facile incidunt.

## §. XXXII.

In *phlegmatico temperamento* calorem humiditas fere superat; Corporis habitus est laxus, pallidus, obesus, pulsus parvus & tardus, vasa sunt angustiora, facies pallida, quandoque livida, appetitus mediocris, alimentorum digestio minus prompte succedit, nutritio fere exuperat, somno fere sepeliuntur tales, sunt ignavi. Semen, quod in tali temperamento elaboratur, est iners. In sensibus & motibus magnus se exerit torpor, adeo multus otii amor, ingenium hebes, ac stupidum judicium, memoria minus felix. Phlegmatici haud facile ad iram concitantur, sunt admodum timidi, nihil alti spirant, sua parum curant, imo fere negligunt, morbisque frigidis valde sunt obnoxii,

In

In *melancholico temperamento* calor magis obtusus observatur; Hinc corpus est frigidum, sed siccum, macilentum, tardum, facies pallida & subfusca, vultus demissus & tristis, incessus tardus, pulsus tardus & ad magnum multum accedens. Quidam multum devorant, in aliis appetitus est mediocris, tarda est alimentorum resolutio, & lenta nutritio. Somnus magis deficit. Semen adest parcius & minus activum. In sensibus, in motu, nulla est activitas. Ingenium quidem torpet, iudicium vero eminet. Sunt, quibus tale est temperamentum, meditantium, circumspicientium, constantes, taciturni, meticulosi, suspicaces, avari, tardius quidem irritantur, verum accensis serius senescit ira, & prorsus sunt implacabiles, injuriarumque tenaces. Malo hypochondriaco, & cacoehymiae melancholicae valde sunt obnoxii.

§. XXXIII.

His ex temperamentorum doctrina praesupponendis praesuppositis, breviori via ad scopum nostrum pertingere licet, ut *per emendationem temperamentorum* intelligamus idoneam proportionis humorum mutationem, qua actiones hominis in melius diriguntur.

§. XXXIV.

Emendationem temperamentorum, mutationem eorundem esse, nullum est dubium, cum omne, quod aliam activitatem obtinere debet, aliam dispositionem, h. e. mutationem subeat, necesse est. Cum vero activitas temperamentorum a definita massae sanguineae dependeat proportionem, haec vero in quantitate, qualitate, miscela, & motu partium massam sanguineam constituentium, consistat; Facile patet, quod earum quantitate, qualitate, vel motu aliter disposito, temperamentum aliam subeat modificationem, hanc vero sequen-



quentes hominis actiones si correctionem subire debent, fini apta ac idonea proportionis humorum mutatio fieri debeat.

## §. XXXV.

Actiones hominis, quæ in aliquo temperamento corrigendæ, & ad melius dirigendæ, sunt vel ejusmodi, quæ ad sanitatem tutandam, vel ad propensionum & inclinationum moderamen faciunt.

## §. XXXVI.

Sanitas terminos habet perfectionis, qui a partium corporis humani constituentium constitutione ponuntur. Sic humorum vitalium proportio sanitatem largitur, ut sua cuique sit temperamento facultas specialis, actiones, quæ homini secundum naturam competunt, exercendi. Ita in hoc temperamento quædam actiones majori ac in illo perstant vigore, in alio se habent mediocriter, in alio ad excessum, in alio ad defectum vergunt. (§. XXX. XXXI. XXXII. XXXIII.)

## §. XXXVII.

In quovis itaque temperamento, ut actionum integritas conservetur & firmetur, pravisque propensionibus frenum injiciatur, apta humorum vitalium proportio conservanda; Vel, si defleat a naturali & convenienti statu, quibusdam in massa sanguinea partibus excedentibus, vel deficientibus, mutanda est, excessum vel defectum præsentem tollendo.

## §. XXXVIII.

Temperamenti emendatione, morum quoque, propensionum & inclinationum correctionem obtineri, nemo in dubium vocabit, si perpendat, quod ob corpus humanum non bene constitutum, propter arctissimum nexum & vinculum male etiam sese habeat animus. Unde prout hujus facultates suo quæque modo afficiuntur, ita quoque mores, qui voluntatis inclinationes sunt, & propensiones, alia atque alia sese habent ratione.

## §. XXXIX.

Cum itaque temperamentorum emendatio in ido-

nea proportionis humorum mutatione consistat, sanguinis & feri vero, adeoque humorum vitalium proportio, a causis §. XIX. XX. XXI. XXII. XXIII. XXIV. XXV. XXVI. XXVII. XXVIII. recensitis dependeat, exinde colligere licet, quod earum conveniens regimen ad temperamentorum emendationem plurimum faciat. Sunt quidem ex illis causæ, quæ non mutari possunt, interrim tamen moderamen admittunt, e. g. viscerum constitutio peculiaris, sexus &c.

§. XL.

Sicut vero massæ sanguineæ proportionem maxime disponit rerum non naturalium conditio & usus, ita quoque in mutanda illa, in emendando temperamento, rerum non naturalium moderamen omne fere absolvit punctum. Quale itaque regimen diæteticum in singulis temperamentis ad eorum emendationem observandum sit, jam indicabimus.

§. XLI.

*In sanguineo temperamento* aër observetur temperate calidus, quia calidior serum dissipat, frigidior autem præter modum auget. Alimenta assumantur temperata, potus tenuis, non nimis spirituosus, quia calidiora & spirituosiora calorem intendunt, serum dissipant. Vitanda itaque aromatica, volatilia, acria, vinum, spiritus vini. Et quo magis inclinant sanguinei ad plethoram, eo magis victum plenum & lautum vitare debent, otioque renuntiantes labores subire. Et cum motus excedens serum absumat, & calorem augeat, deficiens vero feri accumulationi, & ipsius massæ sanguineæ abundantia majori faveat, hinc motus mediocris prodest; Otium vero, somnusque nimius perinde, ut motus deficiens, nocent. Vigiliæ nimia, æque ut motus excedens, serum blandum dissipant, adeoque siccant. Animi pathemata, tum spirituum & humorum motum concentrantia, ut terror, tristitia nimia; tum efferantia, ut ira, gaudium immodicum, nocent. Quoad excreta &



& retenta, si plethora adsit, venæ sectio prudenti instituta ratione prodest. Purgationes immodicæ, sudationes nimix, venus immodica, & omnes evacuationes, quæ nimiam seri absumtionem præstant, damnum pariunt.

§. XLII.

Quia in *choleric* temperamento calor eminet, & serum magis deficit, ea, quæ calorem temperant, & serum augment, optime conveniunt. Sic aër frigidiusculus & magis humidus prodest, contra calidior & siccior calorem intendit, & siccitatem auget. Ut in sanguineo temperamento in alimentis calidiora, aromatica, volatilia, acria, spirituosæ, vitanda sunt, ita in hoc calidiori & sicciori temperamento illa multo majori vitari debent studio ac cura. Juvant vero temperantia, humectantia, gelatinosa, sale nitroso pollentia, potus largior, minus spirituosus, sed dilutior. Motus nimius, vigiliæ modum excedentes valde nocent. Contra motus moderate institutus, somnus largior prodest. Cum cholericis facillime irritentur, omnia, quæ iram movere possunt, solícite sunt removenda. Quoad excreta & retenta omnes nocent evacuationes, quæ serum nimis imminuunt, ut purgationes & sudationes crebrius institutæ. Venæ sectio, imprimis circa ætatis initium instituta, prodest, quia sanguis in hoc temperamento activior exsuperat. Veneris in toro moderatus usus in hoc quoque temperamento prodest.

§. XLIII.

*Phlegmaticum* temperamentum, quia ad intemperiem frigidam & humidam inclinat, bene fert aërem calidiorrem & sicciorrem, frigidus contra & humidus aër nocet. Profunt alimenta calidiora, volatilia, aromatica, potus spirituosus, imprimis vinum generosum. Nocent pituitosa, farinacea, lacticinia, pisces crebrius assumpti, fumo indurata, acida, potus largior, imprimis aqueus. Motus & labores egregie conducunt, nec vigiliæ, si non omnem excedant modum, nocent. Mo-

tus contra defectus, otium, somnus immodicus, intemperiei frigidae magis favent, torporemque augent. Gaudium, ira moderate admissa, huic temperamento magis profunt, quam ut noceant. Tristitia vero, terror, & omnes animi affectus spiritus & humores concentrantes, noxam adferunt. Purgantia phlegmagoga, sudorifera, diuretica, & omnes evacuationes, quæ feri abundantiam corrigunt, maxime conveniunt; contra, quæ partes massæ sanguineæ activiores, jamdum deficientes magis imminuunt, nocent. Sic venæ sectio, imprimis largior, phlegmaticis damnum infert. Ita quoque veneris immodicus usus nocet valde.

## §. XLIV.

*Temperamento melancholico*, quia hoc ad intemperiem frigidam & siccam inclinât, aër commodus est, temperate calidus, haud vero conveniens est aër nimis siccus, pariter & frigidus. Profunt in alimentis, humida, volatilia, cibi moderata aromatum quantitate conditi, potus largior & magis spirituosus, vinum generosum. Nocent cibi sicciores, crudi, visceri, acidi, potus defectus, potus nimis spirituosus, ut spiritus vini. Motus, si modum non excedat, juvat. Admodum vero nocet quies nimia, valde nocent vigiliæ. Somni moderatus usus prodest. Ex animi pathematibus maxime vitanda sunt concentrantia, mœror, curæ; Nec meditationes nimia conveniunt. Nocent omnes evacuationes, quæ serosarum, spirituosarum, & activiorum in massa sanguinea partium defectum augent. Nec minus damnum inferunt sanguinis evacuationes, sudationes nimia. Profunt contra evacuationes, quæ partium in massa sanguinea viscidarum, acidarum, tartarearum, & fixiorum imminutionem præstant. Unde diuretica, purgationes legitime ratione institutæ, haud parum utilitatis adferunt. Veneris usus sit moderatus, necesse est.

## §. XLV.

*Quorum temperamentum sanguineum inclinât ad cholericum*, ii debent omni evitare studio, quæ calorem intendunt, &



& siccitatem augent, contra, quæ calorem temperant, feri sufficientem quantitatem conservant, optime conveniunt. Hinc talis rerum non naturalium usus, qualem §. XLII. commendavimus, observandus venit.

## §. XLVI.

Quorum *temperamentum sanguineum* inclinat ad *phlegmaticum*, iis vitanda sunt, quæ calorem ultra modum minuunt, & humidum magis augent; Contra, quæ calorem & humidum blandum conservant, in sedulum usum vocanda. Sic conveniens est moderatus usus eorum, quæ §. XLIII. phlegmatico temperamento prodesse, asseruntur, aut nocent, quæ phlegmaticum magis invitant.

## §. XLVII.

In *sanguineo-melancholico temperamento*, quæ acidarum, fixiorum, terrestrium partium nimium in massa sanguinea proventum & accumulationem impediunt, calorem vero blandum, & feri sufficientem quantitatem, bonamque qualitatem magis invitant, sunt in usum vocanda. Hinc ea moderate adhibita, profunt, quæ in melancholico temperamento §. XLIV. suavisimus.

## §. XLVIII.

*Cholerico-melancholico temperamento*, quæ humidum augent, & calorem temperatum promovent pariter & conservant, egregie conveniunt. Hinc in tali temperamento rerum non naturalium usus ita moderandus est, ne feri defectus, nec acidarum, fixiorum, terrestrium partium accumulatio intendatur, sed potius feri in quantitate & qualitate boni generatio promoveatur.

## §. XLIX.

In *phlegmatico-sanguineo temperamento*, quæ humidum excedens imminuunt, calorem vero convenientem promovent, magnam utilitatem adferunt. Hinc huc pertinent, quæ §. XLIII. adduximus.

## §. L.

Ad *phlegmatico-melancholici temperamenti emendationem* faciunt, quæ partium in massa sanguinea pituitosarum, acidarum,



darum, fixiorum, terrestrium, eminentium secretionem atque excretionem, sanguinis vero partium activiorum & spirituosarum evolutionem, & feri blandi generationem præstant.

## §. LI.

*In temperamento melancholico-cholerico emendando conveniunt, quæ partium in massa sanguinea eminentium acidobiliofarum, tartarearum, imminutionem, & feri blandi generationem & augmentum præstant.*

## §. LII.

Quo magis vero temperamento transitus ad præternaturalem statum pronus est, eo magis prudentis Medici cura opus est, ut cacochymia omnis tollatur, & naturalis humorum proportio restau-  
retur & conservetur. Enim vero non solum inconvenienti diætæ administratione excessus, vel defectus vitiosi in humoribus vitalibus, & eorum partibus constituentibus, illorum proportionem invertentes, ingruunt, verum etiam viscerum depuratoriorum culpa idem sæpe numero contingit. Quam ob causam tunc ea sunt sollicitè in usum vocanda, quæ viscerum obstructionem expediunt, eorundem tonum naturalem restituant, & roborant. Hinc aperientia appropriata, cum evacuantibus pro re nata interpositis egregie conducunt. Inter illa vero laudem & commendationem maxime merentur martialia rite præparata, quippe quæ humores blande resolvunt, omnem acorem tartareum extinguunt, adeoque massam sanguineam edulcant, fibras quoque roborant, adeoque visceribus tonum addunt eximie, ut in depuranda massa sanguinea officium suum subire, & rite præstare possint.

## §. LIII.

Si temperamentum hominis vitiosam conditionem habeat ex affectu hypochondriaco, scorbuto, affectu hysterico, vel alio morbo præsentè, his malis ex suis loculis est occurrendum, & naturalis humorum vitalium proportio est restituenda.

## §. LIV.

Non solum vero tunc temporis, quando a morbis præsentibus temperamenta vitiosam subiere conditionem, auxilia ex fonte pharmaceutico depromenda, emendationem præstant, sed hæc etiam locum habent, imo in usum sunt vocanda, quamvis præservative



tive magis in omni temperamento, in quo quædam in massa sanguinea partes sunt eminentes, vel aliæ depressæ, vel deficientes. Hinc pro emendatione temperamentorum obtinenda, suademus medicamenta tum alterantia, tum evacuantia, illa quidem, ut partes in massa sanguinea deficientes restituantur, & legitima ratione augeantur; Hæc vero, ut abundantes apte minuantur. Hisce enim modis quodvis temperamentum ab omni intemperie, ad quam tamen inclinat, præservatur, & actionum, quæ homini sunt obeundæ, vigor promovetur & conservatur.

## §. LV.

*Cholerici temperamenti*, tanquam calidioris & siccioris, emendationi inserviunt refrigerantia & humectantia, sanguinem biliosum temperantia, diluentia, ut decoctum herbæ Theæ, aliæque decocta vel infusa theiformia temperatiora, gelatinosa, ut Gelatina cornu cervi, eboris, aliæque gelatinæ, nitrosa & alia salia, & salina media, ut ☐☐olat. arcan. duplicat. ☿antispassmod. Stahlii, arcanum ☐ri cum Rædis citrina & ∇Ω summitat. pini, Rædis temperata Wedelii. Ejusmodi remedia sæpius assumpta calidioris & siccioris temperamenti emendationem præstant.

## §. LVI.

*Pblegmaticum, humidum & frigidum* existens temperamentum emendant, quæ feri abundantis dissipationem & excretionem faciunt, ut Diaphoretica, sudorifera, purgantia pblegmagoga. Quando pituita magis eminet, aperientia, incidentia, resolventia, quæ illam ad secretionem obeundam habilem reddunt, sedulo in usum adhibita, pituitosi temperamenti emendationem efficiunt. Talia sunt Ess. Lignorum, helenii, pimpinellæ albæ, Rædis, ☐ri, MRa tonica Stahlii, ☿cachect. Quercet. Aromatica, & ☉e Ai ooso polentia.

## §. LVII.

*In cholerico-melancholico, nec minus in melancholico-cholerico temperamento emendando*, ea sunt in usum vocanda, quæ partes in massa sanguinea eminentes bilioso-acidas ☐reas, vel acido-biliosas ☐reas corrigunt, earumque secessum promovent, feri vero blandi generationem juvant. Remedia hujus commatis sunt, aperientia, Rædis cydoniata cum arcano ☐ri, & ∇Ω summitatum pini, ☿res absor-



absorbentes & aperitivi, decocta temperantia. Ex evacuantibus inprimis purgantia melanagoga legitima ratione adhibita profunt.

### §. LVIII.

In phlegmatico-melancholico, vel in melancholico temperamento emendando itidem conveniunt *aperientia*, quæ partium in massa sanguinea pituitosarum, acidarum, fixiorum,  $\square$ rearum secretionem atque excretionem, partium vero activiorum & spirituosarum evolutionem juvant. Ex iis apprime conveniunt  $\overline{R}$ æ  $\overline{I}$ tis, ut  $\overline{R}$ æ  $\overline{I}$ tis cydoniata, vel helleborata, cum arcæno  $\square$ ri mixta, addita Essentia quadam aromatica, ut Ess. Calam. arom. Ess. pimpinell. alb. Sic quoque  $\overline{S}$ res aperitivi & aromatici,  $\overline{S}$ cachect.  $\overline{S}$ .zin. Wedelii,  $\overline{S}$ tö-machal. Quercet. Et quando partes in massa sanguinea pituitosæ, acidæ,  $\square$ reæ, ad secessum satis sunt dispositæ, ut earum evacuatio legitima haberi possit ratione, *evacuantia*, e. gr. purgantia interposita officium suum præstant.

### §. LIX.

Ex iis itaque, quæ hactenus adduximus, constare potest, quod temperamentorum emendatio remediis ex duplici fonte, *diætetico* nempe, & *pharmaceutico* desumendis obtineri possit. Valet vero huc quoque, quod in *Libro Aphorismorum Hippocratis* legitur:  $\Delta\omicron\tau\epsilon\iota\omicron\nu\ \delta\epsilon\ \tau\iota\ \chi\alpha\iota\ \tau\omicron\upsilon\ \epsilon\delta\epsilon\iota\ \chi\alpha\iota\ \tau\eta\ \omega\sigma\eta\ \chi\alpha\iota\ \tau\eta\ \chi\omega\sigma\eta\ \chi\alpha\iota\ \tau\eta\ \pi\lambda\epsilon\iota\sigma\tau\eta$ . Concedendum vero est aliquid & consuetudini, & tempori, & regioni, & ætati. Nec peccabimus, si addamus: Concedendum etiam esse aliquid *sexui*, & *vitæ generi*.

### §. LX.

Denique monendum est, ut in iis admittendis & administrandis, quæ corpus & animum alterare, & varie disponere valent, non servos naturæ agamus, sed rectæ rationis dictamini magis, quam appetitui sensitivo obsequium præstemus. Pertinent huc, quæ Seneca Ep. 8. monet: Hanc sanam & salubrem formam vitæ tenere memento, ut corpori tantum indulgeas, quantum bonæ valetudini satis est. Durius tractandum est, ne animo male pareat. His itaque tractationi nostræ finem imponimus, quæ amplius addenda essent, alii reservaturi occasione.

SOLI DEO GLORIA.

ss. ) o ( ss.